

COLUMNA

Hej Peter

ANNE-LOUISE JOËL

Engraziel fetg per la brev cun la conferma che jeu seigi ussa burgheisa dil cantun Grischun. Quels dalla Lumnezia havevan gia scret la stad vargada, e quels da Berna havevan mo tarmess in quen, aber para che vus essas tuts dil medem meini che jeu astgi ussa ir pil pass.

Jeu savevel gnanc che Ti sappies era romontsch. Scret has numnadamein tiptop, mo il schinumnu header has emblidau da midar – leu eisi aunc adina scret «Bürgerrechtsurkunde». Jeu sai buc, sch'il departament da giustia lavura cun word, en mintga cass stos ti mo cliccar dubel sil plaid e lu sas midar ei – p.ex. «cedel da commemoradi dil cantun» ni aschia.

Jeu sai, Ti tratgas forsa ch'ei vali buca la peina, mo ton sco jeu hai udiu, vegn ei a dar minimum aunc in che vul vegnir burgheis sco Romontsch e lu munglass quei esser en uorden. Quel ha numnadamein fatg igl examen. Jeu hai mo scret in tec columnas.

Fora stuess jeu tuttina aunc far quei examen



romontsch, tgei manegias? Buc ch'ei hagi num, ch'jeu seigi seschluitada atras senza. Mo avon in onn devi aunc buc quei examen ed ussa sto quei spitgar. Ussa eisi igl prem da far igl examen da troccas. Ti creis buc tgei pretensius che la glied ha tuttenina. «Tgei? Ti has survegniu il pass senza saver dar troccas?» (Il cuors ha liug mardis vi Laax – quei sas forsa aunc dir a quel cugl examen).

Spetgas lu atgnamein che jeu voteschi ussa per Tei? – Quei sai jeu eba buc, sche jeu vegnel da far. Also buc che Ti seigies buc in flot, aber tgei stoi jeu puspei far, cu il cedel da votar vegn? Lu astgel scriver si tgi che jeu vi e lu strihar e midar vi e neu? E lu stossel

votar per tschun, malgrad che jeu hai mo ina vusch...? Silmeins essas mo siat che candideschon per la Regenza, aber conts/as da quels bunamein 500 candidats/as pil Cussegl grond stossel scriver si?

Ti sentas forsa che jeu sun in tec nervusa. Gl'ei mi'emprema ga. Si Danemarc vevel zuar schon fatg ei, aber leu eisi mo da far ina crusch, e cun quei ch'els voteschan quasi mai, cun quei ch'els han elecziuns mo mintga quater onns e cun quei che jeu erel adina puspei naven, hai jeu strusch ina gada fatg ei.

Suenter esser stada de-democratisada tons onns, sai jeu era buca propi, da tgei vart che jeu sun. Zatgi ha detg a mi che cun la vegliadetgna seigien ins pli dretg. Mo zatgi auter ha detg che cu ins lavuri ella cultura, lu seigien ins seniester. Jeu sai mo che jeu sun zanistrera e fetsch adina purtgem cu jeu stoi strihar zatgei cul culi – panaschar tut quellas 491 candidatAs vegni pia buc a dar tier mei ...

Anne-Louise Joël viva en Lumnezia e meina la Casa d'Angel a Lumbrein. Ella ei naschida e creschida si a Danemarc, nua ins di Ti a tuts – dano a la regina.

«Ventireivels quel che ha ina finamira ella veta.
Aunc pli ventireivels quel,
al qual ei gartegia da stender sia corda
mo aschi ad ault ch'el vegn maneivlamein surora.»

Verdads ed ortgadadas da Gion Deplazes

AURA

Per Pasca detg sulegliv e pli cler

Situaziun generala: Currents auts mainan aria fitg miaivla ed umida che cuntogna era sablun da la Sahara vers la Svizra.
Oz: Nord da las Alps e Grischun Central: Per part sulegliv ed in zic torbel causa il sablun si da l'Africa. Vers saira nivels cumulus e singuls uradis. Fin 20 grads. Sid da las Alps ed Engiadina: Detg sulegliv cun furmazions autas da nivels.
Prognosa: Nord: Venderdi e sonda detg sulegliv, dumengia per gronda part sulegliv. Sid: Venderdi per gronda part sulegliv e pli cler, sonda detg sulegliv e dumengia probablmain detg sulegliv.




FOTO-FINISH

Antruras da sura – Ardez, ina vischnanca exemplarica

Dal 1975 – l'onn che la foto e vegnida fatga - è Ardez vegnì declerà sco ina da las quatter vischnancas svizras exemplaricas en il rom da l'Onn europeic per la protecziun da monumaints e da la

patria. Tge tgi dat surtut en egl sin quella fotografia è, ch'il sviament - che passa ozendi sper il vitg - manca anc. Tge spectacul vegn quai ad esser stà cur che tut il trafic engiadinais – schebain da quel

temp anc betg uschè massiv sco ozendi – as serpeggiava tras las giasas stretgas da la vischnanca engiadinaisa. En posa prominenta è da vesair sin la fotografia la ruina dal Chastè Steinsberg. (fmr/an)



IL TIP

Zambergiar spert in gnieu da Pasca

DANIELA DOBLER/FMR

La lieur da Pasca stat davant porta, e finalmain pon ins puspè star a plaz cun la famiglia, amias e collegs. Per mai è la lieur cun il gnieu da Pasca quasi il «chalender d'advent da primavera» - en sasez insatge per uffants, ma che fa er plaschair a las persunas creschidas.



Sche ti has uss anc temp e quaida pos zambergiar dus uraglias da lieur or dad in toc chartun e targar si ellas sin il vierchel.


Per persunas che n'han betg gudent tschigulatta – gea, para datti da quellas! – pos ti er plazzar ina pitschna narcissa en in vasch, u in cognac dad ovs en ina buttglietta u metter ina chandaila en il vaider...tut tenor il motto «creativitad n'enconuscha betg cunfins».

Jau ta giavisch bler plaschair cun zambergiar e surtut **BELLA PASCA!**

Di per di dat ina redactura u in redactor da la FMR in tip - senza garanzia che quel plaschia a tutas e tuts.

Perquai zambergel jau er gugent gnies da Pasca per in e mintgina. Sche ti fas quai er uschè gugent, lura è mes tip dad oz sco fatg per tai. I sa tracta numnadamein dad in tip per in gnieu da Pasca - fatg spert e pli u main tut cun rauba ch'ins ha en ed enturn chasa.

Ti dovras: in vaider cun viergtel - in pa mistgel – ina chasa da lindorna – e forza in u l'auter crap en furma da cor. Quai chatas ti tut durant ina curta spazegiada en la natira. Lura plazzeschas tut en il vaider e per finir agiunschas anc in regal in, sco p.ex. ina lieur da tschigulatta.



CARICATURA LINUS FLEPP